

**Oqaluuserisassanut nassuaat**

(Inatsisartut Siulittaasuat)

Ippasaq pingasunngornermi ulloq 23. oktober ataatsimiinnitsinni oqaluuserisassani immikkoortut 53, 127, 104, 76 aamma 122 angumerinngitsoorparput, taamaattumillu ullumi ataatsimiinnermi oqaluuserineqqartussatut ingerlateeqqinnejarsimallutik.

Immikkoortut pineqartut tassaapput:

Immikkoortoq 53: Namminersorlutik Oqartussat, Kommunillu sanaartugassanut aningaaasartuutissaanninngaaniit ukiumut 1 %-mik, pisortat sanaartugassaataannut immikkut toqqakanut kusassaanermut aningaaasaliissuteqartalernissaq, kusassaanermilu eqqumiitsuliortunik suleqateqartalernissaq pillugu Naalakkersuisut inatsimmik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Sanaartugassani kusassaanermi sanaartukkap silataata, iluatungaatalu kusassarneqartarnissaat matumani pineqarpoq.

Immikkoortoq 127: Inissiani pisortaqarfiusuni Namminersorlutik Oqartussat Kommuunillu sumiiffimmi kalaallit eqqumiitsuliaannik kusassarneqartartussaatilerlugit pisussaaffeqalernissaat pillugu Naalakkersuisut eqqumiitsuliornermik ingerlatsineq pillugu Inatsisartut inatsisaata allangorteqqullugu peqquneqarnissaannik Inatsisartut aalajangiiffigisassaattut siunnersuut.

Immikkoortoq 104: Aningaaserivimmik, kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Nalunaarusiaq ukioq 2025 aallartinnerani Inatsisartunut agguaanneqassaaq.

Immikkoortoq 76: Peqatigiiffiit kattuffiillu suugaluartulluunniit, nammineq kajumissutsimik ingerlanneqartuni aningaasanik katersuiniarneranni nipilersortartunik Namminersorlutik Oqartussaniit tapiiffigineqarlutik tikisitsisinnaanerat pillugu Naalakkersuisut piareersaateqaqqullugit peqquneqarnissaannik Inatsisartut aalajangiiffigisassaattut siunnersuut.

Immikkoortoq 122: Najukkani innuttaasunik kiisalu takornarianik nunanit allaneersunik suliarinninnissamut pisussaaffik naammassisinnaaniarlugu takornariat amerlanerpaffianni Kalaallit Nunaanni peqqinnissaqarfimmi peqqinnissakkut sulinneqarnermi ikiorserneqartarnissamik aaqqissuulluakkamik isumaqtigiissuteqarnissaq siunertaralugu nunarsuarmi peqqinnissakkut suliniaqtigiiffissuarmut, WHO-mut, attaveqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Taamaalilluni aamma ullumi ataatsimiinnissatta immikkoortut ullumi oqaluuserisassatta sapinngisamik amerlanerpaat naammassiniarneqarnissaat siunertaralugu nalinginnaasumit sivisunerussaaq.

Aningaasaqarnermut Ataatsimiitaliaq immikkoortumut 13-imut isumaliutissiusiornerminut piffissamik sivisunerusumik pisariaqartitsivoq, taamaattumillu immikkoortup 13-ip aappassaaneerneqarnissaat pingajussaaneerneqarnissaalu siulittaasoqarfiup kinguartillugit.

Immikkoortoq 13-imi pineqarpoq:

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinnissaat pillugu Inatsisartut inatsisaat

(Akileraarusiisarnermi iluarsaaqqinnerup piviusunngortinneqarnera il.il.)

Aningaasaqarnermut Akileraartarnermullu Naalakkersuisoq.

Taamaattumik immikkoortoq 13 ullumi ataatsimiinnissatsinnit kinguartinneqarpoq ulloq 12. november aappassaaneerneqartussangortillugu ullaorlu 20. november pingajussaaneerneqartussangorlugu.

**Qinersisarnerit eqqarsaatigalugut ukua akornanni  
isumaqatigiissuteqartoqarpoq:**